

## TI YUDANCIAMO MAYEDIKAAMA MI DIEMA PO

(Wagadugu, li binli 2023, piigincilie dana 31)

### Bulicina Faso dotieba

**Yaab kuli n moa ke tin faabi ti yula, ke tin baa mi yanduama, ke ti Diema n dieri mi yuli canyi ;**

Li tie n po pamanle ke n taa mi maama li binpanli 2024 cilima ki baa gaali Bulicina maabila yaaba n ye mi diema nni leni yaaba n ye potogu, ti danlinba leni ti todikaaba kuli.

Ti tuondi u Tieniu yua n cedi ke ti fidi ki pundi li binli 2023 dajuodikaali leni laafia. Ti jaandi mi njanma Tieniu ki miadi o ke wan cedi ke Bulicina tinga n kuugi yaaba n puni bi miana ti Diema yuceli dierima koanli nni n duani ki fuodi.

Ti go jaandi u Tieniu ki miadi wan paa laafia yaaba kuli ke a nibiada tuongunda poagili ba ti yuceli dierima koanli nni.

Ti pia taanyenma leni yaaba n sani ki niani bi tinbuona nni kuli, ke dinla bi yi ba ti diema nni nisankaaba.

### Yinba n lieba

Li binli 2023 tua yaa binli nni ke ti njanbi ki kpaagi ti Diema Bulicina Faso yema po. Li tie yaa binli nni ke ti njanbi ki kpaagi ki bandi yaa paka n muubi ti Diema Bulicina Faso ; lani n cuani ke ti taa a jagimoana. Laa jaga tie ke ti cie ti yonbidi baabi, leni ti diema yuceli dierima tuoana baabi kuli. Kelima bi yen tua ke o suudo ya suni a bonla, ke a go yini laa suudo ke wan todi a an lingi a tiagu , a kan le laa tiagu.

Li binli 2023 tua yaa binli nni ke a yanjaga tuona boncianla soani. Piigincilie dana 11 daali yaali n pendi, n den tieni mi mataankaama ki waani yi tin taa yaa jaga ke li tuugi leni ti Diema guudima sanbila , laafia sanbila, moko li jeeguoli sanbila nni ; a jaga boncianla taa ti findima po, leni libontagikaala tuonsoandiedi maama tuona cilima. Lan yaa niinni, n tuondi Bulicina dotieba leni bi muali mi yepaama nni, leni ban fidi ki bandi tin koani yaa koanli bundima ti Diema tinbuona goagaama leni Bulicina Faso yuceli dierimoanma.

Li binli 2024 baa tua yaa binli nni ke ti baa suagi liiga leni li muali. Ti baa suagi ki yaa cenli ti yonbidi baabi, ki suagi ki yaa cenli a bonpienyonbidanba baabi yi luo ti ki pangi ti yemanma.

Li binli 2024 nni, ti baa suagi liiga leni ti diema tinbuona goagaama ki go pugini li muali. Lan cedi ke ti diema guudima sanbila nni, ti baa kaani yaa cagicianli n baa ye liiga bu toabu nni, ke bi yi li yaa cagili n paadi ki ye tontoni minteelituona po ; laa cagigili baa taani tontoni minteelituona cagibila, leni yaa minteela yaa banma n ye mibaa caga taanma.

Lan kuli tie ti minteela goaboginma, a siegisiegima leni a kaanma kaantoe sanbila yo, ke lan todi tin fidi ki moa mi yanduama muali njanma. Ti niani tin baa njoadi yaa sanbila ki baa ti toatiadi a minteela po, ki go goa ki bogini ti jakoanda li binli 2023 nni. Laa tuona kuli baa soani li binli 2024 nni, ti toatiadi leni ti jatiadi yaadi n baa pugini a jakoada paalu ya ti cua. Laa bonla pugina po, tin yaa bani ke li binli 2024 baa tua

a muana binli kelima ti jagi ki bua ti tinbuona kuli goagaama leni yaaba n sani ki ñani bi denpo guakunma bi denpo leni bi guudima.

Nani min bi yedi yaala, ti den cili yanjaga boncianla tuona li binli 2023 nni, ti baa suagi ki soani tin cili yaa tuona kuli dunla binli 2024, lan tie mi diema Yudanciamo jaga li jeeguoli po leni bu Kpaabu Koanbadiegu n den cili bu kpaabu leni li yanwubili tuona ya. Li fali kpaabu baa suagi, ke li tuugi leni laa jagilieda, ke dunla binli 2024, tin fidi ki baa li jeeguoli bi ki nagini li.

Li tie tikuli muale, yeni, n miadi Bulicina dotieba, yikuli n taa laa jaga ki soani i kaani kuli yin ye naankani, ke Baalo n fidi ki todi yi, yeni n tie tin moa ki paadi. Ti baa taa a jaga boncianla li bontagikaala tuona sanbila nni leni yaala kuli n yegi leni a kpenkpenda todima, ban yaaba n moandi leni bi fidu kuli ki caani ti kpenditiadi Bulicina Faso tinbuona nni. Apeki (APEC) tuona cili ke lan todi tin fidi ki baa li bontagikaala tuonsoandiedi. A jaga boncianla baa taa li binli 2024 nni.

Li binli 2024 nni, ti go baa mia Bulicina dotieba n taa ti Diema Yudancianmo jagili ti tinbuona findima po ki soani. Nani min den yedi yaala o ñmaalo piigincilie dana 11 daali, ti kpaagi ti laafialo po ki sua li puni tin goa ki maa ki ñanbi ti dobuona. Ti bua bi niba n taa laa jaga ki cili ku ñangu tuona, bi tinbuona maama, ki cedi ti yekaani n yaa ñani ke yaa yianpuodike ke ti den bandi kuli n da go goa ki cua dunla binli.

Tin kubi yaa muali dinla tie ti maasuagu moko yaa muali. Nani yin la ke li tie maama, ti kpaagi ti maasuagu paka po ki sua ke a bonpiena dierima cedi ke ti ñaa ti maasuagu. Ti luni ti maasuagu, ti maasuangu yu n bangi ti mi yanduama, u taayienu leni todiyaba. Ti luni laa bonñanla kuli. Lani n cedi ke ti bua ke ti maasuagu n baa yaa kaanu n pia mayuli ti muali nni.

Lan cedi ke ti pugini ti diema mabuoli gbanmanu ki nan go cilini ti diema nibuoli cagicianli leni taransisiyon n taa yaa balimaama. Li baa cedi ti guani ki tugini leni ti danbogida leni ti maasuagu ke u taayienu, mi yanduama, sugili leni todiyaba taginami yi ke ti luo yeni n goa.

Li suuli tuonjagima suagi li binli 2023 nni. Li binli 2024 nni, ti sugini ki cili li suuli tuona koanli. Yeni yaapo, n bua ki mia yaa caga n tuuni li suuli tuona koanli n kuli n fii ki pugini li muali ke tin fidi ki deli ki ñani laa bonbiadila ti diema nni.

## **Yinba n lieba**

Ti bandi canyi ti sanu, yaa sanbili ke ti taa. Yaa sanu n ñani ti faabima po, ti yuceli dierima po leni Bulicina findima po ki cie laa sanbili naa ye. Tinba leni Bulicina Dotieba kuli bandi canyi ki go dugi canyi ke tin kubi yaa koanli pia mayuli Bulicina Faso po, Ayeyesi (AES) lan tie Sayelli dogi po leni Afiriki dogi kuli po.

N gaali yi leni 2024 binpanli ; lin tua yipo laafia binli, li muali binli, ki tua yaa binli ke Bulicina niba kuli baa pia mi buama biyaba po ; ti sugini lin tua yaa binli nni ke Bulicina dotieba baa cedi yaa koana n ye bi siiga, ki nan taani ñoayenbu ki diidi yaala n ye liiga ; li binli n tua mi yemanma binli, ki tua yaa binli ke yendo yendo kuli suginma baa tieni opo nani wan bua maama.

N kan juodi n yedima kaa tuondi Bulicina dotieba yaaba n bandi ti muali mayuli, ki moa yensiinu leni ñiagu, ki faami ki guu yaa Taransisiyon n tie ne leni mi domaatiema guudima. Nani ban tua maama, yubali nan daa ñuoni o koanli yali ba ; lan tie Bulicina tugu nni bi lan tie niinpo, bonpienyonbidanba daa li baa tuune.

N tuondi Bulicina dotieba leni yaa muali ke ti moa ; ki nan go tuondi yaaba kuli n todi Bulicina Faso laa muali nni, lan tie ke bi ye koaminni bi foagima, ban ye Bulicina Faso tugu nni bi ban ye niinpo, ban ye naankani kuli li nandunli nni.

**Bulicina Faso n yaa ye yogunu kuli !**

**U Tienu n guuri Bulicina Faso !**

**Ti baa dogu po, li yaa dani kuuma, ti baa paadi !**

**Taransisiyon Liiga Yua  
Ti Diema Yudanciamo  
Kapitenni Ibrahim TRAORE**